

淵鑑類函

卷五十一之卷五十二

淵鑑類函卷五十

帝王部十一

帝德
行禮

體仁
帝孝

行義

帝德一

增

易曰君子學以聚之問以辨之寬以居之仁以行之

又曰見龍在田利見大人君德也 又曰君子以多

識前言往行以畜其德 又曰君子以自昭明德 又

曰剛健篤實輝光日新其德 書曰王懋昭大德建中

于民以義制事以禮制心垂裕後昆 又曰德無常師

主善爲師善無常主協于克一 又曰非天私我有商

惟天祐于一德非商求于下民惟民歸于一德德惟一

動罔不吉德二三動罔不凶又曰六三德一曰正直
二曰剛克三曰柔克平康正直彊弗友剛克變友柔克
沈潛剛克高明柔克又曰不役耳目百度惟貞又
曰不剛不柔厥德允修又曰皇天無親惟德是輔
詩曰顥顥印印如圭如璋令聞令望豈弟君子四方爲
綱又曰追琢其章金玉其相又曰如金如錫如圭
如璧又曰威儀抑抑德音秩秩無怨無惡率由羣匹
禮記曰恭儉以求役仁信讓以求役禮左傳子產
曰夫令名德之興也德國家之基也有基無壞毋亦是
務乎有德則樂樂則能久詩云樂只君子邦家之基有

令德也夫上帝臨汝無貳爾心有令名也夫恕思以明德則令名載而行之是以遠至邇安左傳成鱣曰詩曰維此文王帝度其心莫其德音其德克明克明克類克長克君王此大邦克順克比比於文王其德靡悔既受帝祉施于孫子心能制義曰度德正應和曰莫照臨四方曰明勤施無私曰類教誨不倦曰長賞慶刑威曰君慈和徧服曰順擇善而從之曰比經緯天地曰文九德不愆作事無悔故襲天祿子孫賴之

原淮南子曰

體太乙者牢籠天地彈壓山川含吐陰陽申洩四時紀綱八極經緯六合覆露照導普汜而無私翺飛蠕動莫

不似德而生

增鼃錯傳曰五帝神聖其臣莫及故自

親事處于法宮之中明堂之上動靜上配天下順地中
得人故衆生之類無不覆也根著之徒無不載也燭以
光明無偏異也德上及飛鳥下至水蟲草木諸產皆被
其澤然後陰陽調四時節日月光風雨時膏露降五穀
熟祆孽滅賊氣息民不疾疫河出圖洛出書神龍至鳳
鳥翔德澤滿天下靈光施四海此謂配天地治國大體
之功也

原白虎通曰王者承統理調和陰陽陰陽和

萬物序休氣充塞故符瑞並臻皆應德而至德至天則
斗極明日月光甘露降德至地則嘉禾生蓂莢起秬鬯

出太平感德至文表則景星見五緯順軌德至草木則
朱草生木連理德至鳥獸則鳳皇翔鸞鳥舞麒麟臻白
虎到狐九尾白雉降白鹿見白鳥下德至山陵則景雲
出芝實茂陵出異丹阜出萐莆山出器車澤出神鼎德
至淵泉則黃龍見醴泉通河出龍圖洛出龜書江出大
貝海出明珠德至八方則祥風至

增匡衡曰治性之

道必審己之所有餘而強其所不足蓋聰明疏通者戒
于太察寡聞少見者戒于壅蔽勇猛剛強者戒于太暴
仁愛溫良者戒于無斷湛然安舒者戒于後時廣心浩
大者戒于遺忘必審己之所當戒而齊之以義聖德純

茂百姓畏愛上天歆享此永永不易之道也 宋司馬
光曰人君大德有三曰仁曰明曰武仁者非嫗煦姑息
之謂也興教化修政治養百姓利萬物此人君之仁也
明者非煩苛伺察之謂也知道誼識安危別賢愚辨是
非此人君之明也武者非強亢暴戾之謂也惟道所存
斷斷不疑奸不能惑佞不能移此人君之武也故仁而
不明猶有良田而不能耕也明而不武猶視苗之穢而
不能耘也武而不仁猶知穫而不知種也

帝德二

原禮含文嘉曰伏羲德洽上下天應以鳥獸文章地應

以龜書伏羲乃則象作易 帝王世紀曰神農氏有聖

德始教天下種穀故號神農氏諸侯夙沙氏叛不用命

箕文諫而殺之炎帝退而修德夙沙之民自攻其君而

歸炎帝

增史記曰顓頊靜淵以有謀䟽通而知事養

財以任地載時以象天依鬼神以制義治氣以教化潔

誠以祭祀北至于幽陵南至于交趾西至于流沙東至

于蟠木動靜之物大小之神日月所照莫不砥屬 又

曰帝嚳普施利物不於其身聰以知遠明以察微順天

之義知民之急仁而威惠而信修身而天下服取地之

財而節用之撫教萬民而利誨之歷日月而迎送之明

鬼神而敬事之其色郁郁其德嶷嶷

原尚書堯典曰

若稽古帝堯曰放勳欽明文思安安允恭克讓光被四
表格于上下克明俊德以親九族九族既睦平章百姓
百姓昭明協和萬邦黎民於變時雍 大戴禮曰宰我

曰請問帝堯孔子曰其仁如天其智如神就之如日望
之如雲富而不驕貴而不豫 論語曰大哉堯之爲君

也巍巍乎唯天爲大唯堯則之蕩蕩乎民無能名焉巍
巍乎其有成功也煥乎其有文章 符子曰堯曰余坐
華殿之上森然而松生于棟余立櫺扉之內霏然而雲
生于牖雖面雙闕無異乎崔嵬之冠蓬萊雖背墉郭無

異乎迴巒之縈崑崙余安知其所以安榮

增舜典曰

重華協于帝濬哲文明溫恭允塞元德升聞乃命以位

原禮記曰子曰舜其大智也與舜好問而好察邇言

隱惡而揚善執其兩端用其中於民其斯以爲舜乎

孟子曰舜聞一善言見一善行若浚江河沛然莫之能

禦也 大禹謨曰文命敷于四海祇承于帝 大戴禮

曰昔者禹見耕者五耦而式過十室之邑則下爲秉德

之士存焉 **增**說苑曰禹出見罪人下車問而泣之曰

堯舜之人皆以堯舜之心爲心今寡人爲君百姓各自

以其心爲心是以痛之也 商書仲虺之誥曰惟王不

邇聲色不殖貨利德懋懋官功懋懋賞用人惟已改過
不吝克寬克仁彰信兆民 又曰佑賢輔德顯忠遂良
伊訓曰惟我商王布昭神武代虐以寬兆民允懷

又曰先王肇修人紀從諫弗咈先民時若居上克明爲
下克忠與人不求備檢身若不及 **原**帝王世紀曰湯

出見羅者方祝曰從天下者從地出者四方來者皆入
吾羅湯曰嘻盡之矣非桀其孰能爲此哉乃命解其三
面而置其一面更敎之祝曰欲左者左欲右者右欲高
者高欲下者下吾取其犯命者漢南諸侯聞之咸曰湯
之德至矣澤及禽獸況於人乎一時歸者三十六國

周書曰文王在鎬召太子發曰我身老矣吾語汝我所保與我所守傳之子孫吾厚德而廣惠不爲驕侈不爲泰靡童牛不服童馬不馳土不失其宜萬物不失其性天下不失時以成萬材萬材已成牧以爲人天下利之而勿德是謂大仁 韓子曰昔文王請入雒西地赤壤之國方千里以解炮烙之刑天下皆說仲尼曰大哉文王輕千乘之國而請解炮烙之刑 又曰文王伐崇至黃鳳墟而韞繫解乃自結之 論衡曰文王飲酒千鍾孔子百觚言聖人能以德持酒也如一坐千鍾百觚此酒徒非聖人也 呂氏春秋曰周文王使人相地得死

人之骸吏以聞于文王文王曰更葬之吏曰此無主矣
文王曰有天下者天下之主也有一國者一國之主也
遂令吏以衣冠更葬之天下聞之曰文王賢矣澤及骸
骨

增

帝王世紀曰武王克商旌商容之間釋箕子之

囚散鹿臺之財發鉅橋之粟

原

又曰武王自孟津還

及于周見暍人王自左擁而右扇之

史記曰孔子言

必世而後仁善人爲邦百年亦可以勝殘去殺矣誠哉
是言漢興至孝文四十有餘載德至盛也

增

又曰高

祖寬仁愛人意豁如也有大度不事家人生產性明達
好謀能聽旣即位自監門戍卒見之如舊

桓子新論

曰太宗有仁智通明之德承漢初定躬儉省約以惠體
百姓救贍困乏除肉刑減律法葬埋薄損輿服所謂達
于養生送終之實者也及始從代徵時謀議狐疑能從
宋昌之策應聲馳來即位而偃武脩文施布大恩欲息
兵革與匈奴和親總撮綱紀故遂褒增隆爲太宗也

又曰武帝才質英妙有崇文廣業之規故即位而開發
大志考合古今獲前聖代事迹改正朔制度招選俊傑
奮揚威怒武藝四加所征者服興起六藝廣進儒術自
開闢以來漢家最爲盛圖故顯爲世宗可謂卓爾絕世
之主矣

原前漢張禹傳曰成帝敬厚禹禹每病輒以

起居聞車駕自臨問之上親拜禹牀下

增東觀漢記

曰光武時馬援謂隗囂曰到朝廷凡數十未嘗有見明主如此也才能驚人其勇非人之敵開心見誠與人語好醜無所隱諱圖講天下事極盡下情兵事方略量敵較勝濶達多大節與高帝等經學博覽政事文辯前世無比囂曰如卿言勝高祖耶曰不如也高祖大度無可無不可今上好吏事動如節度不飲酒囂曰如卿言反復勝也 袁山松後漢書曰前漢成哀以來天地縱橫巨猾竊命世祖以眇眇之祚起白水之濱扇之以仁風驅之以大威霜雪被而叢棘枯綱維振而逆鱗埽羣才

畢奏人思與能數年之間廓清四海雖爲中興與夫開創者寧有異乎馬生之言固以寥廓大度同符高祖又資太宗之仁兼孝宣之明故能享有神器據萬物之上

後漢書曰明帝善刑理法令分明日晏坐朝幽枉必

達內外無倖曲之私在上無矜大之色斷獄得情號居

前代十二

十斷其二言刑少也

故後之言治者莫不先建武永平

之政

又曰魏文稱明帝察察章帝長者帝素知人厭

明帝苛切事從寬厚除慘獄之科著胎養之令承奉明德太后盡心孝道割裂名都以崇建周親平徭簡賦而人賴其慶又體之以忠貞文之以禮樂藩輔克諧羣后

德讓謂之長者不亦宜乎

晉書曰武帝宇量弘厚造

次必于仁恕容納讜正未嘗失色于人明達善謀能斷

大事故得撫寧萬國綏靜四方

原續晉陽秋曰簡文

帝弱而惠異中宗深器焉及長美風姿好清言舉心端

詳器服簡素與劉惔王濛等爲布衣之遊

增冊府元

龜曰後魏道武帝幼遭艱難備嘗險阻具知民之情僞

及在位躬行仁厚協和民庶既定中原患前代刑網峻

密乃約定科令大崇簡易是時天下民久苦兵亂畏法

樂安帝鎮之以淵默罰必從輕兆庶欣戴焉

又曰魏

孝文惇睦九族禮敬俱深雖於大臣持法不縱然性寬